

19. fundur (aukafundur) hreppsnefndar Ásahrepps var haldinn á skrifstofu Ásahrepps mánudaginn 18. maí og hófst hann kl. 20:00.

Fundinn sátu:

Egill Sigurðsson, Elín Grétarsdóttir, Brynja Jóna Jónasdóttir, Karl Ölvisson og Nanna Jónsdóttir. Fundargerðin var færð í tölvu og hana ritaði Nanna Jónsdóttir.

Oddviti setti fund.

Dagskrá:

1. Ljósleiðari.

Kl. 20:00 mættu þeir Guðmundur Daníelsson verkefnisstjóri og Jón Páll Hilmarsson HDL.

Hreppsnefnd Ásahrepps er meðvituð um þá miklu þörf sem er á því í nútíma samfélagi að hafa aðgang að háhraða nettengingu. Slík eftirspurn eykst stöðugt og telst nú þegar nauðsyn í daglegu lífi einstaklinga og í daglegum rekstri fyrirtækja. Hreppsnefnd Ásahrepps telur að skortur á háhraða nettengingu í sveitarfélaginu hafi neikvæð áhrif á framþróun samfélagsins.

Engin fjarskiptafélög hafa sýnt því áhuga að koma að uppbyggingu ljósleiðarakerfis í sveitarfélaginu, þrátt fyrir að hreppsnefnd Ásahrepps hafi birt auglýsingu þar sem leitað var eftir aðilum sem hefðu áhuga á því að koma að uppbyggingu ljósleiðarakerfis. Jafnvel þó að fjarskiptafélög hafi ekki sýnt því áhuga á að koma að uppbyggingu á ljósleiðarakerfi í sveitarfélaginu, þá er eftirspurnin eftir slíkri nettengingu engu minni en á svæðum þar sem íbúafjöldi er hærri.

Þar sem hreppsnefnd Ásahrepps telur núverandi ástand á nettengingum í sveitarfélaginu óásættanlega hefur hún tekið ákvörðun um að ráðast í það verkefni að tengja öll heimili, fyrirtæki og sumarhús í sveitarfélaginu, sem svo kjósa, við ljósleiðaranet.

Hreppsnefnd Ásahrepps telur aðgang íbúa sveitarfélagsins að háhraða nettengingu vera þjónustu sem hefur almenna, efnahagslega þýðingu.

Vegna þessa samþykkir hreppsnefnd Ásahrepps, með vísan til ákvörðunar framkvæmdastjórnarinnar frá 20. desember 2011 um beitingu 2. mgr. 106. gr. sáttmálans um starfshætti Evrópusambandsins gagnvart ríkisaðstoð í formi bóta til tiltekinna fyrirtækja sem veita opinbera þjónustu sem hefur almenna efnahagslega þýðingu (2012/21/ESB), sem tekin var upp í EES-samninginn og aðlöguð að honum með ákvörðun sameiginlegu EES-nefndarinnar nr. 66/2012 frá 30. mars 2012, eftirfarandi vegna fyrirhugaðrar lagningar ljósleiðara í sveitarfélaginu:

Fyrirtækið sem hreppsnefnd felur að annast lagningu ljósleiðara í Ásahreppi mun heita Ásaljós.

Ásaljós verður rekið sem deild innan sveitarfélagsins og því alfarið á ábyrgð sveitarfélagsins.

Hreppsnefnd skal hafa yfirumsjón með Ásaljósi.

Bókhaldi Ásaljóss skal halda aðskildu frá bókhaldi sveitarfélagsins með skýrum hætti. Hreppsnefnd skal fylgjast með rekstri, bókhaldi og fjárhagsstöðu verkefnisins. Í samræmi við góðar reikningsskilavenjur skal fara fram árleg endurskoðun á bókhaldi verkefnisins.

Ljósleiðarakerfið verður alfarið í eigu sveitarfélagsins.

Inntak hinnar opinberu þjónustu sem Ásaljósi er ætlað framkvæmda og veita er að tengja öll heimili, fyrirtæki og sumarhús í sveitarfélaginu, sem svo kjósa, við ljósleiðaranet (FTTH, e. Fiber To The Home) og mun gera öllum íbúum sveitarfélagsins mögulegt að hafa aðgang að háhraða ljósleiðaratengingu a.m.k. næstu 25 árin. Það svæði sem verkefnið tekur til skal vera afmarkað við sveitarfélagið Ásahrepp.

Engin sérstök réttindi eða einkaréttindi verða veitt vegna verkefnisins.

Ásaljós verður fjármagnað af sveitarfélaginu og þeim tekjum sem af þjónustunni hljótask.

Hreppsnefnd Ásahrepps hefur kynnt sér og samþykkir frumhönnun og kostnaðarmat verkefnisins,

Hreppsnefnd

unnið af Guðmundi Daníelssyni verkefnisstjóra. Þar er lýst fyrirkomulagi á fjármögnun verkefnisins, kostnaðaráætlun, forendum fyrir útreikningum og hvernig eftirliti með greiðslum verður háttað og endurskoðun á greiðslum vegna verkefnisins.

Hreppsnefnd Ásahrepps felur verkefnisstjóra að samþykkja tilboð lægst bjóðanda sem er Verkís 950.000 kr. + vsk í gerð útboðsgagna. Einnig samþykkir hreppsnefnd stjórnskipulag, samskiptaáætlun og ferli breytingastjórnunar verkefnisins sem kynnt var og tekur það gildi við samþykkt hreppsnefndar.

Samþykkt samhljóða.

Guðmundur og Jón Páll víkja af fundi kl. 21:30.

2. Heimasíða

Tilboð í nýja heimasíðu yfirfarin.

Í upphafi kjörtímabilsins setti núverandi hreppsnefnd sér það markmið að efla upplýsingamiðlun til íbúa. Ekkert tæki hentar betur til þess en öflug heimasíða. Umferð um heimasíðuna hefur aukist í takt við aukinn fréttaflutning. Hreppsnefnd hyggst reyna að gera betur og samþykkir að ganga að tilboði Emstra ehf um hönnun og uppsetningu á nýrri heimasíðu fyrir 620.000 kr. + vsk. Fastur rekstarkostnaður lækkar um 7.150 kr. á mánuði. Sveitarstjóra falið að ganga frá samningi. Samþykkt samhljóða.

3. Motus kynning.

Hreppsnefnd samþykkir að heimila sveitarstjóra að ganga til samninga við Motus/Lögheimtan ehf um samning vegna innheimtu vanskilakrafna á grundvelli minnisblaðs frá Motus dags. 15. maí s.l. Samningurinn verður til þriggja ára með mögulegri framlengingu til tveggja ára. Samþykkt samhljóða.

4. 17. júní.

Umræður um fyrirkomulag á 17. Júní skemmtun Ásahrepps. Samþykkt að hátíðin verði haldin með svipuðu sniði og áður. Sveitarstjóra falið að vinna málið áfram.

Næsti fundur boðaður 9. júní 2015

Fundargerð yfirlesin og samþykkt

Fleira ekki gert

Fundi slitið kl. 22:30.